

Na osnovu člana 8. stav 3. alineja 4. i 8. Zakona o načelima lokalne samouprave u Federacije Bosne i Hercegovine ("Službene novine Federacije BiH", broj 49/06), člana 2. i 42. Zakona o građenju („Službene novine KSB/SBK“, broj: 10/14), člana 7. i 29. Zakona o privremenom korištenju javnih površina na području SBK/KSB („Službene novine SBK/KSB“, broj 14/16), i člana 91. Statuta Općine Travnik (prečišćeni tekst „Službene novine Općine Travnik", br.11/05) Općinsko vijeće Travnik na svojoj sjednici održanoj dana _____ 2022. godine **donijelo je:**

O D L U K U

o privremenom korištenju javnih površina na području općine Travnik

I. OPĆE ODREDBE

Član 1.

Ovom Odlukom utvrđuju se javne površine koje se mogu privremeno koristiti, njihova namjena, uslovi i načini dodjele lokacija i privremenog korištenja, poslovi prvostepenog upravnog rješavanja iz oblasti urbanizma i komunalnih poslova, način određivanja naknade i naplate za korištenje javne površine, nadzor nad provođenjem ove odluke kao i ostala pitanja bitna za privremeno korištenje javnih površina na području općine Travnik (u daljnjem tekstu: Općine).

Član 2.

Pod privremenim korištenjem javne površine podrazumijeva se pravo postavljanja privremenih objekata i sadržaja na dijelu javne površine na određeno vrijeme, na način koji ne utiče na promjenu karaktera javne površine koja se privremeno koristi.

Član 3.

(Namjena površina)

Javne površine mogu se privremeno koristiti za postavljanje privremenih objekata i sadržaja iz člana 2. Zakona o privremenom korištenju javnih površina na području SBK/KSB, odnosno iz člana 15. i člana 28. ove Odluke.

Član 4.

Korisnik javne površine, istu može koristiti samo u svrhe i na način određen ovom Odlukom a u skladu sa privremenim rješenjem kojim se odobrava postavljanje (u daljem tekstu: odobrenje za postavljanje) i privremenim rješenjem o dozvoli za korištenje javne površine (u daljem tekstu: dozvola za korištenje), pribavljenim od Službe za urbanizam, građenje, katastar i imovinsko-pravne poslove Općine Travnik (u daljem tekstu: Služba za urbanizam) ili privremenim rješenjem o komunalnom odobrenju (u daljem tekstu: komunalno odobrenje) pribavljenim od Službe za zajedničke i komunalne poslove Općine Travnik (u daljem tekstu: Služba za komunalne poslove), a sve uz potpisan ugovor ili jednokratno plaćenju naknadi za korištenje javne površine.

Član 5. (Zone)

Javne površine za privremeno korištenje na području općine Travnik svrstane se u tri zone.

Prva zona obuhvata uže područje lokaliteta Plava Voda, Ulicu Šumeće, glavnu pješačku zonu naselja Žitarnica te ulicu Bosanska od Žitarnice do spoja s ulicama Kulina bana i Aleja konzula, odnosno do kružnog toka kod kasarne, obuhvatajući Centralni gradski trg, Trg grada Lajpciga, dio Ispred zgrade Vlade SBK/KSB, te dio Stanične ulice, obuhvatajući lokacije koje gravitiraju-„gledaju“ prema pomenutim ulicama, u obuhvatu ove zone.

Druga zona u gradskom području Travnika obuhvata proširenu zonu lokaliteta Plava Voda i naselje Šumeće do spoja Mostarske ulice i magistralnog puta, širi obuhvat naselja Žitarnica, lokalitet Gasulhane od kojeg granica druge zone ide magistralom sve do raskršća kod Bolnice, odnosno kod JKP Bašbunar i ide ulicom Kulina Bana preko kružnog toka kod kasarne te ulicom Aleja Konzula do kružnog toka u naselju Meljanac obuhvatajući isti kao i lokalitet Leke, te lokacije koje gravitiraju-„gledaju“ prema pomenutim ulicama, te se tako granica sa druge strane formira od kružnog toka na Meljancu, nizvodno rijekom Lašvom do spajanja sa ovom zonom šireg obuhvata naselja Žitarnica. Takođe, druga zona obuhvata uže urbano područje naselja: Turbe, Nova Bila i Kalibunar.

Treća zona je ostatak cijelog područja općine Travnik.

Sastavni dio ove Odluke je Grafički prikaz zona javnih površina iz ovog člana.

Član 6. (Planovi)

Obaveza je donošenja Planova korištenja javnih površina (u daljem tekstu: Plan) kao sastavnog dijela ove Odluke, za prvu zonu i za objekte i sadržaje iz člana 15. tačka 1; 2; 3. i 4. ove Odluke.

Planovima mogu biti obuhvaćeni određeni objekti, lokacije i lokaliteti koji su u drugoj zoni, ako se time postiže brzina i ekonomičnost rješavanja zahtjeva, a posebice za postavljanje kioska, samostalnih ugostiteljskih bašti i bašti uz ugostiteljske objekte.

Iz istih razloga, mogu se donositi i planovi za slobodnostojeće reklamne nosače-bilboard-e, toteme, svjeleće reklame, reklame na fasadama zgrada i sl. (u daljem tekstu: Reklame), kao i za samostalne prodajne štandove – tezge (u daljem tekstu: Tezge), te za ostale objekte i sadržaje ukoliko se na nekom odnosnom području planira postavka više tih objekata i sadržaja .

II. USLOVI I KRITERIJI ZA PRIVREMENO KORIŠTENJE JAVNIH POVRŠINA

Član 7.

Pravo na privremeno korištenje javnih površina u smislu ove Odluke imaju pravna i fizička lica registrovana za obavljanje djelatnosti kao i vlasnici ili korisnici stambenih, stambeno-poslovnih i poslovnih objekata-prostora, kao i ostalih prostora za koje se traži korištenje javne površine.

Član 8.

(Zahtjev za privremeno korištenje javne površine)

Zahtjev za privremeno korištenje javne površine podnosi se na posebnom obrascu nadležnoj službi u skladu sa članom 15. ili 28. ove Odluke.

Član 9.

Služba će odobriti privremeno korištenje javne površine ako su ispunjeni sljedeći uslovi:

1. ako je lokacija u zoni obuhvata posebnog plana korištenja.
2. ako lokacija koja nije u zoni obuhvata posebnog plana korištenja i nije u koliziji sa uslovima iz ove Odluke a prethodno je pribavljeno potrebno stručno mišljenje iz člana 13. ove Odluke.
3. ako su riješeni imovinski odnosi, odnosno ako je sklopljen ugovor o korištenju ili jednokratno plaćena naknada korištenja određene javne površine.
4. ako je dostavljena potrebna projektna dokumentacija.
5. ako podnositelj zahtjeva nema dugovanja prema Općini po bilo kojem osnovu za protekli period.
6. ako korištenje javne površine ne ometa sigurnost odvijanja kolskog i pješačkog saobraćaja.
7. ako se ne ometa pristup okolnim objektima, podzemnim i drugim instalacijama,

Član 10.

(Dodjela lokacija na osnovu Planova)

Lokacije za privremeno korištenje javne površine za objekte obuhvaćene određenim Planom, tačnije objekte iz člana 19. i 20. ove Odluke, dodjeljuje nadležna služba na osnovu izvoda iz tog Plana za tu lokaciju i riješenih imovinskih odnosa sklapanjem ugovora sa Općinom Travnik ili jednokratnim plaćanjem, uz prethodno javno oglašavanje za prvo postavljanje objekta na tu lokaciju.

Uslov za provođenje javnog oglašavanja je taj, da predmetnu lokaciju u tom trenutku niko ne koristi.

Zakupni odnos zasniva se sa najpovoljnijim ponuđačem prema provedenom oglasu na maksimalni period do tri godine, uz mogućnost produžavanja zakupa pod istim uslovima.

Član 11.

Lokaciju za privremeno korištenje javne površine za objekte koji su izvan područja obuhvaćenih Planom, tačnije za objekte iz člana 19; 20; 21. i 22. ove Odluke (kada se radi o lokaciji u drugoj ili trećoj zoni), dodjeljuje nadležna služba donošenjem rješenja.

Rješenje iz prethodnog stava ovog člana, daje se na osnovu analize odnosne lokacije i razmotrenih svih činjenica sa urbanističko-tehničkog, saobraćajnog, infrastrukturnog, sanitarno-higijenskog, arheološkog, hortikulturnog, i svakog drugog potrebnog aspekta te ako postoje prostorne mogućnosti za postavku tog sadržaja.

Član 12.

Korisnici javnih površina su dužni u svemu se pridržavati uslova određenih u rješenju o privremenom postavljanju ili korištenju javne površine.

U slučaju prestanka obavljanja djelatnosti, kao i proteku vremenskog perioda određenog u rješenju o privremenom postavljanju ili korištenju javne površine, privremeni korisnik javne površine dužan je privremeni objekat ukloniti i zauzetu javnu površinu dovesti u prvobitno stanje, s danom prestanka rada, odnosno od istekom roka u rješenju.

Član 13.

U slučaju potrebe uređenja javne površine u javnom interesu ili u slučaju privođenja zemljišta krajnjoj-planiranoj namjeni, korisnici javnih površina dužni su na prijedlog nadležne službe ukloniti objekte i sadržaje postavljene na javnoj površini i prije isteka roka utvrđenog u rješenju a sve o vlastitom trošku.

Rješenje o prijevremenom uklanjanju predmetnog objekta donosi služba koja je i izdala odgovarajuće odobrenje.

Član 14.

(Prestanak prava korištenja javne površine)

Pravo privremenog korištenja javne površine prestaje istekom roka utvrđenog u privremenom rješenju.

Pravo privremenog korištenja javne površine prestaje i prije isteka roka utvrđenog u privremenom rješenju o korištenju javne površine u slučaju:

1. ako korisnik ne koristi javnu površinu na način i u svrhe kako je određeno ovom odlukom ili rješenjem o privremenom korištenju javne površine,
2. ako korisnik bespravno koristi veću površinu od površine odobrene rješenjem,
3. ako na javnoj površini čije je privremeno korištenje odobreno rješenjem, djelatnost obavlja osoba čije ime nije navedeno u rješenju,
4. ako se utvrdi, da je korisniku javne površine pravosnažnom odlukom nadležnog organa zabranjeno obavljanje privredne djelatnosti navedene u rješenju o privremenom korištenju javne površine.
5. Ako se odnosna lokacija privodi drugoj ili planiranoj namjeni, što utvrđuje Općina Travnik.

Prestanak prava privremenog korištenja javne površine utvrđuje rješenjem služba koja je izdala odobrenje.

Za postojeće sadržaje na javnim površinama kojima je istekao rok utvrđen u rješenju ili su postavljeni suprotno odredbama ove Odluke, nadležna inspekcija Općine je dužna i obavezna poduzeti odgovarajuće postupke iz svoje djelatnosti, što za cilj ima prestanak prava korištenja javne površine.

III. POSLOVI UPRAVNOG RJEŠAVANJA I NADLEŽNOSTI

II-1. Služba za urbanizam

Član 15.

Služba za urbanizam rješava zahtjeve za privremeno korištenje javne površine za postavljanje:

1. Montažno-demontažnih poslovnih objekata – kioska,
2. Samostalnih ugostiteljskih bašti,
3. Bašti uz ugostiteljski objekat otvorenog tipa – ljetne (sezonske) bašte
4. Bašti uz ugostiteljski objekat zatvorenog tipa – ljetno-zimske bašte
5. Slobodnostojećih reklamnih nosača (billboard-a), totema, svjetlećih reklama, reklama na fasadama zgrada, reklamnih-komercijalnih putokaza i sl;
6. Telefonskih govornica
7. Stubova za internetski priključak
8. Antenskih stubova, baznih stanica, razvodnih ormara i sl.
9. Jarbola
10. Reklamnih putokaza
11. Privremenih javnih parkirališta.

Formiranje i upravljanje javnim parkiralištima uređuje se posebnom odlukom i propisima.

Član 16.

Služba za urbanizam, nakon provedenog upravnog postupka donosi odgovarajući akt.

Služba za urbanizam, može tražiti stručno mišljenje i od drugih institucija, ako je obavezno ili po procjeni potrebno.

Ukoliko se radi o pozitivnom ishodu, Služba za urbanizam donosi privremeno rješenje o odobrenju za postavljanje i/ili privremeno rješenje o dozvoli za korištenje.

Član 17.

(Odobrenje za postavljanje)

Privremeno rješenje o odobrenju za postavljanje vlasnik objekta ili sadržaja traži i dobija od Službe za urbanizam, koja isto donosi po skraćenom upravnom postupku.

Odobrenje za postavljanje sadržava grafički prikaz ili ovjerenu projektnu dokumentaciju ili njen dio, koji u vizuelnom smislu jasno govori o lokaciji, položaju, obliku, dimenzijama, bitnim udaljenostima odobrenog objekta ili sadržaja kao i veličini-kvadraturi zauzete javne površine.

Odobrenje za postavljanje mora jasno propisati obavezu i način rješavanja imovinskih odnosa i pribavljanje dozvole za korištenje.

Član 18.

(Dozvola za korištenje)

Dozvolu za korištenje vlasnik objekta ili sadržaja traži i dobija od Službe za urbanizam a na osnovu pravosnažnog rješenja o odobrenju za postavljanje, zajedno sa pribavljenim dokazom riješenih imovinskih odnosa za korištenje javne površine u vidu potpisanog ugovora o zakupu ili jednokratno plaćenog obračunatog iznosa za korištenje javne površine.

U postupku donošenja rješenja o dozvoli za korištenje dostavlja se odgovarajuća projektna dokumentacija urađena od strane ovlaštene kuće-biroa ukoliko objekat ili sadržaj zahtjeva statičke proračune. Za jednostavnije objekte tipa kiosk i sl. dovoljna je tehnička dokumentacija ili specifikacija tog industrijski proizvedenog tipskog objekta ili sadržaja. Za mobilnu opremu koja se postavlja na javnoj poršini, dovoljno je rješenje iz člana 17. ove Odluke.

Ako se radi o produženju, odnosno obnovi potrebne dokumentacije za postavljeni objekat ili sadržaj za koji je već donošeno rješenje o dozvoli za korištenje, nije potrebno ponovo prilagati projektnu dokumentaciju ili tehničku specifikaciju.

Dozvola za korištenje donosi se po skraćenom upravnom postupku

Dozvola za korištenje se obavezno donosi za postavljanje objekata iz člana 19; 20; 21; 22; 23; 24; 25; 26. i 27. ove Odluke.

Član 19.

(Montažni poslovni objekti - kiosci)

Montažni poslovni objekti - kiosci postavljaju se na osnovu privremenog rješenja o postavljanju i privremenog rješenja o dozvoli za korištenje.

Kiosk je industrijski proizvedena, tehnološki dovršena, cjelovita i tipizirana prostorna jedinica, lagane konstrukcije, koja se može postavljati, premještati i uklanjati sa lokacije u komadu-cjelini.

U geometrijskom obliku to je oblik položenog kvadra, pravougaone osnove i kao takav se preporučuje pri postavci, vodeći računa o oblikovno-estetskom izražaju.

Kiosci mogu biti i drugih geometrijskih višeplošnih oblika, u osnovi kao višeogaonik ili kao krug, ovisno o lokaciji i uslovima koje ta lokacija nalaže ali i zahtjevu vlasnika kioska o čemu odlučuje Služba za urbanizam.

U urbanom dijelu Travnika, kiosci se postavljaju isključivo na osnovu posebnog Plana.

Izuzetno, ukoliko se javi potreba za određenom lokacijom, Služba za urbanizam predloži a Općinski načelnik prihvata/ne prihvata taj prijedlog.

Služba za urbanizam zadržava pravo odabira ili zamjene tipa, oblika i izgleda objekta u bilo kojem vremenu njegovog postojanja, postavljanja ili zahtjeva vlasnika za zamjenom tipa objekta.

Kada se radi o prvom postavljanju kioska na slobodnoj lokaciji, obavezno se provodi licitacioni postupak.

Postavljanje objekata iz ovog člana odobrava se na određeni period ovisno o uslovima za odnosnu lokaciju a najduže na period do tri godine, uz mogućnost produženja.

Objekti iz ovog člana, koji su postavljeni na osnovu odgovarajućeg odobrenja, nakon isteka perioda iz tog odobrenja, vlasnici i dalje mogu zadržati postavljenim pod uslovom pribavljanja novog, produženog ili obnovljenog odobrenja, bez obaveze provođenja licitacionog postupka.

Član 20.

(Samostalne ugostiteljske bašte)

Samostalne ugostiteljske bašte u urbanom dijelu Travnika, postavljaju se na osnovu privremenog rješenja o postavljanju i privremenog rješenja o dozvoli za korištenje.

Objekti iz ovog člana su tipovi ugostiteljskih objekata kao zasebni montažni objekti, sa svim sadržajima potrebnim za funkcionisanje tog objekta i te namjene.

Postavljanje samostalnih ugostiteljskih bašti na terenu izvodi se na prethodno pripremljenom i uređenom terenu za tu namjenu od strane Općine Travnik ili od strane investitora kao pobjednika javnog oglašavanja, odnosno licitacionog postupka, na osnovu prethodno usvojene projektne dokumentacije i propisanih uslova.

Postavljanje objekata iz ovog člana podliježe proceduri javnog oglašavanja a isti se odobravaju na određeni period, tačnije za sezonu koja traje od 01. aprila do 30. septembra tekuće godine.

Postavljanje objekata iz ovog člana može se odobriti i na duži period, ovisno o uslovima za odnosnu lokaciju a najduže na period do tri godine.

Izuzetno u odnosu na prethodni stav kada se radi o posebnim uslovima, ovi objekti se mogu postaviti i na duži period uz posebni obligacioni odnos vlasnika bašte sa Općinom Travnik na koji Općinsko vijeće daje saglasnost.

Objekte iz ovog člana koji su već postavljeni, nakon isteka odobrenog perioda, vlasnici i dalje mogu zadržati postavljenim pod istim uslovima bez obaveze provođenja licitacionog postupka, a na maksimalni period do tri godine.

Član 21.

(Bašte uz ugostiteljski objekat otvorenog tipa – ljetne-sezonske bašte)

Bašte uz ugostiteljski objekat objekat otvorenog tipa – ljetne-sezonske bašte, postavljaju se na osnovu privremenog rješenja o postavljanju i privremenog rješenja o dozvoli za korištenje.

Privremeno rješenje o postavljanju donosi se na osnovu Plana korištenja javnih površina na području općine Travnik, za postavljanje ugostiteljskih bašti, ili ako lokalitet nije obuhvaćen Planom, na osnovu privremenog rješenja Službe za urbanizam, uz saglasnost Općinskog načelnika

Objekte i sadržaje iz ovog člana predstavlja odobrena oprema za postavljanje kao što su: stolovi, stolice, klupe, nadstrešnice, tende, suncobrani, saksije, žardinjere, rashladni uređaji, tv i sl. uređaji sa nosačima, zvučnici, dekorativna ili pvc platna, segmenti ograda i sl; koja zbirno predstavlja jednu funkcionalnu cjelinu uz određeni ugostiteljski objekat, koja nakon uklanjanja sa javne površine ne smije ostavljati tragove oštećenja te javne površine.

Oprema iz prethodnog stava, prvenstveno: stolovi, stolice, klupe, nadstrešnice, tende i suncobrani, mora biti jednoobrazna.

Postavljanje objekata i sadržaja iz ovog člana ne podliježe proceduri javnog oglašavanja a isti se po zahtjevu vlasnika ugostiteljskog objekta odobrava se na određeni period, tačnije za sezonu koja traje od 01. aprila do 30. septembra tekuće godine.

Izuzetno iz prethodnog stava, ugostiteljske bašte iz ovog člana, mogu se postaviti i van sezone, u periodu od 01.10. do 31.03. odnosno prije ili poslije ljetne sezone.

Površina koja ne ulazi u obračun naknade za zauzetu javnu površinu je površina-koridor koji služi kao slobodni prilaz prema ulazu u ugostiteljski objekat, u maksimalnoj širini od jednog metra.

Član 22.

(Bašte uz ugostiteljski objekat zatvorenog tipa – ljetno-zimske bašte)

Bašte uz ugostiteljski objekat objekat zatvorenog tipa, odnosno ljetno-zimske bašte, postavljaju se na osnovu privremenog rješenja o postavljanju i privremenog rješenja o dozvoli za korištenje.

Privremeno rješenje o postavljanju, donosi se na osnovu Plana korištenja javnih površina na području općine Travnik, za postavljanje ugostiteljskih bašti, ili ako lokalitet nije obuhvaćen Planom, na osnovu privremenog rješenja donesenog na osnovu odluke nadležne Službe za urbanizam, uz saglasnost Općinskog načelnika.

Objekte i sadržaje iz ovog člana prvenstveno predstavlja primarna konstrukcija sa nadstrešnicom i platformom, te ispunom između stubova konstrukcije kliznim ili krilnim staklenim ili pvc panelima, koja uključuje opremu kao iz prethodnog člana, odnosno opremu ljetnih bašti, što zbirno predstavlja jednu funkcionalnu cjelinu uz određeni ugostiteljski

objekat, koja nakon uklanjanja sa javne površine ne smije ostavljati tragove oštećenja te javne površine.

Primarna konstrukcija ljetno-zimskih bašti pored funkcionalnog, mora zadovoljavati estetski i ambijentalni aspekt.

Postavljanje objekata i sadržaja iz ovog člana ne podliježe proceduri javnog oglašavanja a isti se po zahtjevu vlasnika ugostiteljskog objekta odobrava na određeni period, a maksimalno do tri godine.

Postavljanje objekata i sadržaja iz ovog člana, sa mogućnošću zatvaranja bašte u svakom trenutku kliznim ili krilnim panelima, podliježe obaveznom načinu plaćanja zauzete javne površine u skladu sa članom 48. ove Odluke.

Prije donošenja rješenja o dozvoli za korištenje, uslov za donošenje istog je zaključen ugovor sa Općinom Travnik o zakupu javne površine za odobreni period.

Član 23. (Reklame)

Slobodnostojeći reklamni nosači (billboard-i), i totemi sa vlastitom konstrukcijom, koji imaju svoje temeljne stope, kao i svjetleće reklame i reklame na fasadama zgrada ili stubovima ulične rasvjete, reklamni-komercijalni putokazi i sl; (u daljem tekstu: Reklame) postavljaju se na osnovu privremenog rješenja o postavljanju, te privremenog rješenja o dozvoli za korištenje.

Osnovne činjenice za postavke reklama utvrđuju se na terenu, tačnije da iste ispunjavaju minimalne urbanističko-tehničke uslove a koje utvrđuje Služba za urbanizam, uz činjenicu da iste ne predstavljaju smetnju drugim objektima ili objektima infrastrukture, kao i da ne narušavaju ambijentalni izgled ili pogled, i da isti nisu u suprotnosti sa važećim propisima.

Objekti iz ovog člana, koji se postavljaju na javnoj površini a u putnom pojasu regionalnih i magistralnih puteva, postavljaju se na osnovu važećih propisa JP Ceste Federacije Bosne i Hercegovine (u daljem tekstu: Ceste FBiH), te Služba za urbanizam iste odobrava u skladu sa odredbama stava 1 ovog člana i doneseno rješenje dostavlja nadležnoj instituciji za taj put: JP Ceste FBiH ili Kantonalnoj direkciji za puteve SBK/KSB, i to rješenje je uslovljeno pribavljanjem rješenja od nadležnog upravitelja tog puta/ceste.

Ne smije se predvidjeti korištenje javne površine za postavljanje slobodnostojećih reklamnih panoa i slobodnostojećih displeja većih od 2 m² na udaljenosti manjoj od 50 m od objekata kulturne baštine (spomenika, grupnih zdanja, znamenitog mjesta), izuzev oznaka i natpisa koji govore o tom objektu.

Član 24. (Stubovi za internet priključak)

Stubovi za internet priključak (za bežičnu-wireless opciju) postavljaju se na uređenim ili neuređenim javnim površinama koje su u fazi uređenja ili koje nisu privedene krajnjoj namjeni, ili preko namjenskog nosača na fasadama zgrada, postavljaju se na osnovu privremenog rješenja o postavljanju i privremenog rješenja o dozvoli za korištenje.

Stubovi za internet priključak postavljaju se na određeni period a maksimalno do tri godine, koje uključuje automatsko produžavanje postavke istih pod istim uslovima (obnova odobrenja), a isti se ostavljaju postavljenim sve do potrebe korištenja javne površine za drugu ili planiranu namjenu.

Postavka ovih stubova odobrava se samo pravnim licima i služe za javno korištenje u komercijalne svrhe ili za slobodno-besplatno korištenje.

Stubovi za internet priključak mogu sadržavati reklamni sadržaj u vidu logotipa i uputa za konektovanje, u okviru odobrenog oblika i gabarita.

Član 25.

(Antenski i slični stubovi, bazne stanice, razvodni ormari i sl.)

Antenski i slični stubovi, bazne stanice, razvodni ormari i sl postavljaju se na uređenim ili neuređenim javnim površinama koje su u fazi uređenja ili koje nisu privedene krajnjoj namjeni, ili preko namjenskog nosača na fasadama zgrada, postavljaju se na osnovu privremenog rješenja o postavljanju i privremenog rješenja o dozvoli za korištenje.

Sadržaji iz ovoga člana postavljaju se na određeni period a maksimalno do tri godine, koje uključuje automatsko produžavanje postavke istih pod istim uslovima (obnova odobrenja), a isti se ostavljaju postavljenim sve do potrebe korištenja javne površine za drugu ili planiranu namjenu.

Postavka sadržaja iz ovoga člana, odobrava se samo pravnim licima registrovanim za obavljanje telekomunikacionih usluga.

Sadržaji iz ovoga člana mogu sadržavati reklamni sadržaj u vidu logotipa, u okviru svog oblika i gabarita.

Član 26.

(Jarboli)

Jarboli se postavljaju na uređenim ili neuređenim javnim površinama koje su u fazi uređenja ili koje nisu privedene krajnjoj namjeni, postavljaju se na osnovu privremenog rješenja o postavljanju i privremenog rješenja o dozvoli za korištenje.

Jarboli se postavljaju isključivo za korist i interes pravnih lica ili udruženja na određeni period a maksimalno do tri godine, koje uključuje automatsko produžavanje postavke istih pod istim uslovima (obnova odobrenja), i isti se ostavljaju postavljenim sve do potrebe korištenja javne površine za drugu ili planiranu namjenu.

Član 27.

(Specifični-ostali objekti i sadržaji)

Pod specifičnim-ostalim objektima i sadržajima smatraju se objekti montazno-demontažne konstrukcije, vezane za objekat i/ili tlo čvrstom razdvojom vezom, koji zauzimaju javnu površinu kao aneksi postojećih objekata ili prostora, predviđeni za posebne namjene pod uslovom da ne ugrožavaju kolske i pješačke komunikacije, te da nisu na štetu drugih objekata i infrastrukture.

Objekti iz ovog člana, odobravaju se u skladu sa članom 11. ove Odluke a to su:

- Rampe za invalidna lica.
- Pomoćna, požarna ili ostala dodatna stepeništa.
- Nadstrešnice iznad ulaza u objekte ili prostore.
- Dječija i ostala rekreativna igrališta ili vježbališta i sl.

Za objekte iz ovog člana, mora se imati odgovarajuća projektna dokumentacija ili pribaviti odgovarajući atesti.

II-1. Služba za komunalne poslove

Član 28.

Služba za komunalne poslove rješava zahtjeve za privremeno korištenje javne površine za postavljanje:

1. samostalnih štandova za prigodnu prodaju – tezge,
2. promotivnih i humanitarnih štandova,
3. izložbeno-prodajnih stolova, polica i tezgi ispred trgovačkih i uslužnih objekata,
4. zabavnih-luna parkova i šatora,
5. rashladnih uređaja za napitke i industrijski proizveden sladoled, uređaja i aparata za spravljanje napitaka, kokica, kukuruza, palačinki i sl;
6. održavanje kulturnih, zabavnih, sportskih, humanitarnih i ostalih manifestacija i sl;
7. klupa za sjedenje i korpi za otpatke,
8. stubića, rampi, betonskih žardanijera i ostalih pokretnih barijera,
9. rampi ili kapija, građevinskih skela i montažnih (gradilišnih) ograda a zbog izvođenja građevinskih radova,
10. saobraćajnih znakova i putokaza koji označavaju smjer kretanja saobraćaja,
11. deponovanje građevinskog materijala,
12. odlaganje zemlje i šuta, i drugog otpadnog građevinskog materijala poštujući uslove iz Odluke o komunalnom redu.

Član 29.

Služba za komunalne poslove, nakon provedenog upravnog postupka donosi odgovarajući akt.

Ukoliko se radi o pozitivnom ishodu, Služba za komunalne poslove donosi privremeno rješenje o komunalnom odobrenju.

Član 30.

(Komunalno odobrenje)

Privremeno rješenje o komunalnom odobrenju, Služba za komunalne poslove donosi po skraćenom postupku za postavljanje objekata i sadržaja iz svoje nadležnosti, ako postoje prostorne mogućnosti i ako se ne ometa kolski i pješački saobraćaj, te ako postavljeni objekat ili sadržaj nije u koliziji sa drugim propisima.

Komunalno odobrenje može sadržavati i grafički prikaz koji u vizuelnom smislu jasnije govori o lokaciji, položaju, obliku, dimenzijama, bitnim udaljenostima odobrenog objekta ili sadržaja kao i veličini-kvadraturi zauzete javne površine ili može da sadrži izvod iz posebnog Plana.

U postupku donošenja rješenja o komunalnom odobrenju moraju biti definisani imovinski odnosi sa Općinom Travnik, za pravna ili fizička lica zaključen ugovor ili jednokratno plaćena naknada.

Služba za komunalne poslove može tražiti stručno mišljenje od drugih Službi za upravu Općine, ali i od drugih institucija, ako je obavezno ili po procjeni potrebno za donošenje rješenja o komunalnom odobrenju..

Član 31.
(Samostalni štandovi - tezge)

Samostalni štandovi - tezge, u urbanom dijelu Travnika, postavljaju se na osnovu privremenog rješenja o komunalnom odobrenju.

Objekti iz ovog člana su tipizirani montažni objekti, izrađeni za izlaganje i prodaju roba, koji zauzimaju javnu površinu od 2,0 do 4,0 m².

Objekti iz ovog člana odobravaju na određeni period, a najduže do godinu dana.

Kada se radi o postavci ovih objekata za prigodnu prodaju u vrijeme praznika, isti se odobravaju na period do sedam dana.

Član 32.
(Promotivni i humanitarni štandovi)

Promotivni i humanitarni štandovi, postavljaju se na uređenim javnim površinama, na osnovu privremenog rješenja o komunalnom odobrenju.

Objekti iz ovog člana su, namjenski izrađeni, preuređeni ili modifikovani za održavanje aktivnosti iz ovog člana.

Promotivni i humanitarni štandovi zauzimaju maksimalnu površinu do 4,0 m².

Izuzetno iz prethodnog stava, kada se radi o promotivnom štandu koji uključuje postavku promotivne opreme ili održavanje performansa i sl. može se odobriti i dodatna površina u zavisnosti od prostornih mogućnosti.

Na humanitarnim štandovima na javnim površinama, ne smije se prikupljati novac nego se samo smiju dijeliti humanitarni letci i sl.

Postavljanje objekata iz ovog člana odobrava se na određeni period a najduže na period do deset dana.

Izuzetno iz prethodnog člana, odobravanje ove vrste objekata i sadržaja može se odobriti i duže uz prethodnu saglasnost Općinskog načelnika ali ne duže od 30 dana.

Član 33.
(Izložbeno-prodajni stolovi i police ispred trgovačkih i uslužnih objekata)

Izložbeno-prodajni stolovi i police ispred trgovačkih i uslužnih objekata postavljaju se na uređenim javnim površinama ispred objekta, na osnovu privremenog rješenja o komunalnom odobrenju.

Objekti iz ovog člana su, namjenski izrađeni, preuređeni ili modifikovani za izlaganje robe ispred objekta ili prezentaciju usluga.

Objekti iz ovog člana zauzimaju javnu površinu u skladu sa potrebama korisnika ali tako da ispunjavaju urbanističko-tehničke uslove i nisu na štetu drugim licima i objektima.

Objekti iz ovog člana moraju zadovoljavati estetsko-ambijentalne uslove.

Postavljanje objekata iz ovog člana odobrava se na određeni period a najduže na period do godinu dana.

Član 34.
(Zabavni-luna parkovi i šatori)

Zabavni-luna parkovi i šatori postavljaju se na uređenim ili neuređenim javnim površinama, na osnovu privremenog rješenja o komunalnom odobrenju.

Ako se radi o relativno neuređenoj i uslovno neuslovnoj lokaciji za postavljanje objekata iz ovog člana i ako korisnik ipak želi postaviti ovu vrstu objekata, dužan je lokaciju prethodno urediti u vidu čišćenja od korova i eventualnog smeća, bez ikakve čvrste gradnje, o svome trošku a što će se jasno propisati komunalnim odobrenjem.

Član 35.
(Frižideri i ostali uređaji i aparati)

Rashladni uređaji za napitke i industrijski proizveden sladoled - (frižideri) postavljaju se uz poslovne objekte/prostore, ili uz kioske sa važećim odobrenjem a mogu i kao samostalni na osnovu privremenog rješenja o komunalnom odobrenju uz uslov da se radi o pravnom licu.

Kada se frižideri i ostali uređaji i aparati postavljaju kao samostalni, odobrava se postavka dodatne opreme kao što je suncobran, stolica, manji radni sto-pult i sl. zauzimajući ukupno javnu površinu maksimalno do 6,0 m².

Frižideri i ostali uređaji i aparati postavljaju se na određeni period u ljetnoj sezoni a može i maksimalno tokom cijele kalendarske godine, odnosno do godinu dana.

Samostalni frižideri i ostali uređaji i aparati moraju imati prethodno riješeno pitanje snadbijavanja električnom energijom na tehnički ispravan način ili riješen tehnički ispravan priključak na drugi izvor energije, agregat, plin i sl.

Uređaji i aparati za spravljanje i prodaju napitaka, kokica, kukuruza, palačinki i sl. mogu biti poluautomatskog ili automatskog tipa i moraju biti izrađeni od ovlaštenog proizvođača sa potrebnim atestima.

Član 36.
(Manifestacije)

Održavanje kulturnih, zabavnih, sportskih, humanitarnih i ostalih manifestacija i sl. vrši se na osnovu privremenog rješenja o komunalnom odobrenju.

Manifestacije se u pravilu odobravaju na kraći period a maksimalno do 30 dana.

U izuzetnim slučajevima, manifestacije koje traju duže vrijeme i od posebnog su značaja za Općinu, potrebna je prethodna saglasnost Općinskog načelnika.

U okviru manifestacija iz prethodnog stava, komunalnim odobrenjem može se odobriti održavanje manifestacije na jednoj ili više lokacija, uz postavku određenih objekata i sadržaja iz ove Odluke ili Odluke o komunalnom redu, a maksimalno do kada traje predmetna manifestacija.

Član 37.
(Klupe za sjedenje i korpe za otpatke)

Klupe za sjedenje i korpe za otpad, postavljaju se na uređenim ili javnim površinama koje su u fazi uređivanja a na osnovu privremenog rješenja o komunalnom odobrenju.

Klupe za sjedenje i korpe za otpad postavljaju se isključivo za javno korištenje na određeni period a maksimalno do tri godine, koje uključuje automatsko produžavanje postavke istih pod istim uslovima bez obaveze podnošenja posebnog zahtjeva a iste se ostavljaju postavljenim sve do potrebe korištenja javne površine za drugu namjenu.

Postavka klupa za sjedenje i korpi za otpad može se odobriti fizičkim i pravnim licima uz njihovo finansiranje.

Klupe za sjedenje i korpe za otpad postavljene od strane lica iz prethodnog stava, mogu sadržavati prigodne poruke ili posvete te reklamni sadržaj za koji se plaća odgovarajuća naknada za veličinu reklamne površine.

Član 38.
(Pokretne i prenosive barijere)

Stubići, rampe, betonske žardanijere, i ostale pokretne i prenosive barijere, postavljaju se na uređenim javnim površinama a na osnovu privremenog rješenja o komunalnom odobrenju.

Objekti i oprema iz ovog člana postavljaju se prvenstveno zbog zaprečavanja fizičkog prolaza određenim površinama kao i za preusmjeravanje vozila ili fizičko zaprečavanje parkiranja vozila zbog nesmetanog pristupa objektima.

Objekti i oprema iz ovog člana postavljaju se na određeni period a maksimalno do tri godine, koje uključuje automatsko produžavanje postavke istih pod istim uslovima bez obaveze podnošenja posebnog zahtjeva a iste se ostavljaju postavljenim sve do potrebe korištenja javne površine za drugu namjenu.

Postavka ovih objekata i opreme može se odobriti fizičkim i pravnim licima uz njihovo finansiranje.

Član 39.
(Postavljanje opreme zbog izvođenja građevinskih radova)

Rampe ili kapije, građevinske skele i montažne (gradilišne) ograde zbog izvođenja građevinskih radova, postavljaju se na javnim površinama na osnovu privremenog rješenja o komunalnom odobrenju, uz prethodno dostavljen prihvatljiv elaborat za postavljanje montažne (gradilišne) ograde ili projekat uređenja gradilišta u kojem je obrađen način korištenja javne površine.

Osnovni uslov odobravanja postavke opreme iz ovog člana je posjedovanje pravosnažnog rješenja o odobrenju za građenje/dozvole za korištenje. Takođe, odobravanje ove opreme može se vršiti na osnovu pravosnažnog rješenja o urbanističkoj saglasnosti ukoliko nije potrebno pribavljanje odobrenja za građenje ili na osnovu odobrenja za postavljanje ukoliko nije potrebna dozvola za korištenje.

Oprema iz ovog člana postavlja se na određeni period dok traju predmetni radovi a maksimalno do jedne godine.

Postavka ove opreme odobrava se pravnim licima koji obavljaju poslove građenja na odnosnom gradilištu ili fizičkim licima kao investitorima tog objekta.

Postavka ili korištenje opreme iz ovog člana ne smije ugrožavati nesmetan kolski i pješački saobraćaj, odnosno učesnike u saobraćaju.

Član 40.
(saobraćajni znakovi i saobraćajni putokazi)

Saobraćajni znakovi i saobraćajni putokazi koji označavaju smjer kretanja saobraćaja, postavljaju se na javnim površinama, fasadama objekata i stubovima ulične rasvjete, na osnovu privremenog rješenja o komunalnom odobrenju.

Izgled i oblik saobraćajnih znakova, dopunskih tabli i saobraćajnih putokaza za gradove, općine, naselja i sl. definisani su posebnim saobraćajnim propisima.

Član 41.
(Deponovanje građevinskog materijala)

Deponovanje građevinskog materijala odobrava se na uređenim, neuređenim ili javnim površinama koje su u fazi uređenja ili koje nisu privedene krajnjoj namjeni a na osnovu privremenog rješenja o komunalnom odobrenju.

Osnovni uslov odobravanja deponovanja građevinskog materijala je posjedovanje pravosnažnog rješenja o odobrenju za građenje ili odobrenja za uklanjanje građevine.

Deponovanje građevinskog materijala odobrava se i iz razloga izvođenja građevinsko-zanatskih radova za koje nije potrebno odobrenje za građenje, odnosno mogu se izvoditi na osnovu rješenja o urbanističkoj saglasnosti ili privremenog rješenja o odobrenju za postavljanje ili privremenog rješenja o dozvoli za korištenje, u kojima mora jasno navedena ta odredba.

Deponovanje građevinskog materijala odobrava se na određeni period dok traju predmetni radovi a maksimalno do šezdeset dana, a zemlje, šuta i drugog otpadnog građevinskog materijala, samo onoliko koliko se može odvesti u toku jednog dana.

Deponovanje građevinskog materijala i šuta odobrava se pravnim licima koji obavljaju poslove građenja ili uklanjanja građevine na odnosnom gradilištu ili fizičkim licima kao investitorima ili vlasnicima tog objekta.

Komunalnim odobrenjem za ovaj vid zauzimanja javne površine utvrđuje se obaveza korisnika da javnu površinu ogradi i označi propisanim oznakama, da ne ometa odvijanje saobraćaja te da privremeno zauzetu površinu i površinu okolo održava u čistom stanju.

Materijal privremeno smješten na javnu površinu mora biti uredno složen ili deponovan tako da ne sprečava oticanje atmosferskih voda.

Za sva eventualna oštećenja okolnih i infrastrukturnih objekata pri korištenju javne površine odgovoran je korisnik.

IV. NAKNADE ZA PRIVREMENO KORIŠTENJE JAVNIH POVRŠINA

Član 42.

Za privremeno korištenje javne površine korisnik je dužan plaćati naknadu koja se uplaćuje na određenu stavku budžeta Općine.

Odobrenja i dokaz o uplaćenju naknadi za privremeno korištenje javne površine korisnik treba imati kod sebe cijelo vrijeme korištenja javne površine.

Član 43.

U slučaju da se javna površina koristi bez prethodno pribavljenog odobrenja, plaćene naknade ili sklopljenog ugovora sa Općinom Travnik, ili se postupa suprotno ostalim uslovima iz odobrenja, vlasnik gubi pravo korištenja a nadležni inspektor će po hitnom postupku donijeti rješenje o uklanjanju predmetnog objekta sa javne površine o trošku korisnika-vlasnika bespravno postavljenog objekta, opreme ili sadržaja.

U tom slučaju, vlasnik objekta gubi pravo korištenja javne površine u naredne tri godine.

Član 44.

Obračunski period za korištenje javne površine u svrhu postavljanja sadržaja iz člana 21. ove Odluke, odnosno bašti uz ugostiteljski objekat, traje od 01.04. do 30.09. tekuće godine, te se za taj period postavljanja plaća sezonska mjesečna naknada kako je i određeno članom 47. ove Odluke.

Vansezonski period za korištenje javne površine u svrhu postavljanja sadržaja iz člana 21. ove Odluke, odnosno bašti uz ugostiteljski objekat, je od 01.10. tekuće do 31.03. naredne godine i tada se sezonska naknada umanjuje za 50%, kako je i određeno članom 47. ove Odluke.

Korisnici koji zazmu javnu površinu u svrhu postavljanja sadržaja iz člana 21. ove Odluke, odnosno postave baštu uz ugostiteljski objekat na dan 21.03. kada je Dan općine Travnik, za taj dan se oslobađaju naknade, pod uslovom da je bašta postavljena pod uslovima kao i minule sezone.

Ostali korisnici koji javnu površinu koriste na osnovu dnevnog, mjesečnog ili godišnjeg obračuna naknade, plaćaju navedenu naknadu za cijeli odobreni period

Član 45.

Mjesečna naknada za postavljanje montažnog poslovnog objekta, tipa kiosk i sl. specifičnog sadržaja, iz člana 19. ove Odluke, plaća se po zauzetoj javnoj površini u iznosu od:

- I zona: 10,00 KM/m²
- II zona: 8,00 KM/m²
- III zona: 6,00 KM/m²

Ove cijene su ujedno i početne cijene za prvo javno oglašavanje-licitaciju.

Član 46.

Mjesečna naknada za postavljanje samostalnih ugostiteljskih bašti iz člana 20. ove Odluke, u sezoni, plaća se po zauzetoj javnoj površini u iznosu od:

- I zona: 12,00 KM/m²
- II zona: 10,00 KM/m²
- III zona: 8,00 KM/m²

Ove cijene su ujedno i početne cijene za prvo javno oglašavanje-licitacija. Mjesečna naknada za ove bašte umanjuje se za 50% van ljetne sezone.

Član 47.

Mjesečna naknada za postavljanje bašti otvorenog tipa – ljetne-sezonske bašte ispred ugostiteljskih objekata iz člana 21. ove Odluke, plaća se po zauzetoj javnoj površini u iznosu od:

- I zona: 10,00 KM/m²
- II zona: 8,00 KM/m²
- III zona: 6,00 KM/m²

Mjesečna naknada za ove bašte umanjuje se za 50% van ljetne sezone.

Član 48.

Mjesečna naknada za postavljanje bašti zatvorenog tipa, ljetno-zimskih bašte uz ugostiteljski objekat, iz člana 22. ove Odluke, plaća se po zauzetoj javnoj površini u iznosu od:

- I zona: 10,00 KM/m²
- II zona: 8,00 KM/m² š
- III zona: 6,00 KM/m²

Mjesečna naknada za ove bašte se ne umanjuje, odnosno ista se plaća tokom cijele godine u gore navedenim iznosima.

Član 49.

Mjesečna naknada za korištenje javne površine u svrhu postavljanja reklama iz člana 23. ove Odluke, plaća se po veličini reklamne površine a iznosi:

- I zona: 8,00 KM/m², a osvijetljena 12,00 KM/m²
- II zona: 6,00 KM/m², a osvijetljena: 9,00 KM/m²
- III zona: 4,00 KM/m², a osvijetljena 6,00 KM/m²

Ukoliko se radi o dvostranoj reklami, ova naknada se dodatno uvećava za 50% u odnosu na navedene iznose naknada za jednostrane reklame.

Član 50.

Godišnja naknada za postavljanje stubova za internet priključak iz člana 24. ove Odluke, plaća se u iznosu od:

- I zona: 100,00 KM/m²
- II zona: 75,00 KM/m²
- III zona: 50,00 KM/m²

Ukoliko se ovim stubom distribuira bežična mreža slobodna i besplatna za sve korisnike, naknada se ne naplaćuje.

Član 51.

Godišnja naknada za postavljanje antenskih i sličnih stubova iz člana 25. ove Odluke, plaća se u iznosu od:

- I zona: 500,00 KM/m²
- II zona: 400,00 KM/m²
- III zona: 300,00 KM/m²

Član 52.

Godišnja naknada za postavljanje jarbola iz člana 26. ove Odluke, plaća se u iznosu od:

- I zona: 40,00 KM/jarbolu
- II zona: 30,00 KM/jarbolu
- III zona: 20,00 KM/jarbolu

Ukoliko se radi o javnim institucijama, nevladinim organizacijama i udruženjima građana, naknada se ne naplaćuje.

Član 53.

Godišnja naknada za postavljanje specifičnih sadržaja i objekata iz člana 27. ove Odluke, plaća se u iznosu od:

- I zona: 40,00 KM/m²
- II zona: 30,00 KM/m²
- III zona: 20,00 KM/m²

Ukoliko se radi o rampama za invalidne osobe ili požarnom stepeništu, kao i dječijim i ostalim rekreativnim igralištima-vježbalištima i sl. postavljenim u nekomercijalne svrhe, naknada se ne naplaćuje.

Član 54.

Mjesečna naknada za postavljanje samostalnih štandova – tezgi, iz člana 31. ove Odluke, plaća se u iznosu od:

- I zona: 40,00 KM/m²
- II zona: 30,00 KM/m²
- III zona: 20,00 KM/m²

Ukoliko se radi o postavci tezgi iz člana 31. stav 4, ove Odluke, plaća se dnevna naknada u iznosu od:

- I zona: 10,00 KM/m²
- II zona: 7,50 KM/m²
- III zona: 5,00 KM/m²

Član 55.

Dnevna naknada za postavljanje promotivnih štandova iz člana 32. ove Odluke, plaća se u iznosu od:

- I zona: 10,00 KM/m²
- II zona: 8,00 KM/m²
- III zona: 6,00 KM/m²

Naknade za postavljanje promotivnih štandova, oslobađaju se lica koja ih postavljaju, pod uslovom da dokažu da istim promovišu kulturu i sport.

Naknade za postavljanje humanitarnih štandova oslobađaju se i lica koja ih postavljaju, pod uslovom da dokažu svoj humanitarni karakter i rad za konkretan slučaj.

Član 56.

Godišnja naknada za postavljanje izložbeno-prodajnih stolova, polica i tezgi ispred trgovačkih i uslužnih objekata, iz člana 33. ove Odluke, plaća se u iznosu od:

- I zona: 360,00 KM/m²
- II zona: 270,00 KM/m²
- III zona: 180,00 KM/m²

Član 57.

Dnevna naknada za postavljanje zabavnih-luna parkova i šatora, iz člana 34. ove Odluke, plaća se u iznosu od:

- I zona: 1,00 KM/m²
- II zona: 0,80 KM/m²
- III zona: 0,60 KM/m²

Član 58.

Dnevna naknada za postavljanje rashladnih uređaja za napitke i industrijski proizveden sladoled, uređaja i aparata za spravljanje napitaka, kokica, kukuruza, palačinki i sl; iz člana 35. ove Odluke, plaća se u iznosu od:

- I zona: 2,00 KM/m²
- II zona: 1,50 KM/m²
- III zona: 1,00 KM/m²

Član 59.

Dnevna naknada za zauzetu javnu površinu u cilju održavanja manifestacija iz člana 36. ove Odluke, plaća se u iznosu od:

- I zona: 1,00 KM/m²
- II zona: 0,80 KM/m²
- III zona: 0,60 KM/m²

Naknade za zauzetu javnu površinu u cilju održavanja kulturnih, zabavnih, sportskih, predizbornih, humanitarnih, zdravstvenih i sličnih manifestacija korisnih zajednici i javnom interesu, Načelnik Općine, može osloboditi lica koja koja koriste javnu površinu za ove svrhe.

Član 60.

Godišnja naknada za zauzetu javnu površinu za postavljanje klupa za sjedenje i korpi za otpatke, iz člana 37. ove Odluke, plaća se samo u slučaju ako ti sadržaju imaju reklamnu površinu, u iznosu od:

- I zona: 80,00 KM/m² reklamne površine
- II zona: 60,00 KM/m² reklamne površine
- III zona: 40,00 KM/m² reklamne površine

Ukoliko se radi o postavci klupa za sjedenje i korpi za otpatke od strane Općine Travnik, JKP Bašbunar i ostalih javnih institucija, kao i nevladinih organizacija i udruženja, naknada se ne naplaćuje ukoliko se reklama odnosi na te institucije.

Član 61.

Mjesečna naknada za zauzetu javnu površinu postavljanjem montažnih, pokretnih i prenosivih barijera iz člana 38. ove Odluke kojima se ograđuje ili određuje javna površina a koja se koristi za lične potrebe stanara zgrade ili korisnika prostora, plaća se u iznosu od:

- I zona: 15,00 KM/m²
- II zona: 12,00 KM/m²
- III zona: 10,00 KM/m²

Član 62.

Dnevna naknada za zauzetu javnu površinu postavljanjem rampi ili kapija, građevinskih fasadnih skela i montažnih gradilišnih ograda iz člana 39. ove Odluke, a kojima se zauzima i ograđuje javna površina zbog izvođenja građevinskih radova plaća se u iznosu od:

- I zona: 0,50 KM/m²
- II zona: 0,40 KM/m²
- III zona: 0,30 KM/m²

Član 63.

Ukoliko se radi o saobraćajnim znakovima i saobraćajnim putokazima koji označavaju smjer kretanja saobraćaja, iz člana 40. ove Odluke, koji su nekomercijalnog karaktera i isti su u javnom interesu, naknada se ne naplaćuje

Član 64.

Dnevna naknada za deponovanje građevinskog materijala, iz člana 41. ove Odluke, plaća se po zauzetoj javnoj površini u iznosu od:

- I zona: 0,60 KM/m²
- II zona: 0,40 KM/m²
- III zona: 0,30 KM/m²

Član 65.

Naknada za zauzetu javnu površinu se ne naplaćuje za postavljanje:

- putokaza i sličnih sadržaja (saobraćajnog i javnog nekomercijalnog karaktera),
- stubića, betonskih žardanijera i ostalih pokretnih barijera, kojima se ne ograđuje javna površina za javno korištenje, odnosno postavljene u korist javnog interesa.
- antena za internet u nekomercijalne svrhe.

V. UPRAVNI I INSPEKCIJSKI NADZOR, ŽALBENI POSTUPCI

Član 66.

(Upravni nadzor)

Nadležna služba vodi evidenciju korisnika javnih površina za tekuću godinu na način da se u bazi podataka korisnika javnih površina unose podaci vezani za objekat ili sadržaj na javnoj površini, kao što su: naziv korisnika, adresa korisnika, lokacija, broj rješenja, period korištenja, djelatnost, vrsta objekta, površina, zona, visina i datum uplate cjelokupne naknade ili dijela naknade (rate).

Protiv lica koja ne uplate naknadu za korištenu javnu površinu ili ne izmire dug, Služba koja vodi evidenciju tog korisnika, pokreće postupak utuženja kod nadležnog suda putem Općinskog pravobranilaštva Travnik

Član 67.

(Inspeksijski nadzor)

Inspeksijski nadzor nad provedbom ove odluke vrše građevinski ili komunalni inspektor u okviru svojih nadležnosti.

Prilikom obavljanja nadzora, inspektor ima pravo i dužnost da od korisnika javne površine zatraži na uvid odgovarajuće odobrenje za korištenje javne površine i dokaz o uplaćenju naknadi za privremeno korištenje te javne površine.

Ako korisnik javne površine inspektoru ne posjeduje ili neda na uvid traženo odobrenje i dokaz o plaćenju naknadi, inspektor će zapisnički konstatovati utvrđene činjenice i naložiti zabranu privremenog korištenja javne površine i korisniku naložiti da u roku od tri dana dostavi dokaz o podnesenom zahtjevu nadležnoj službi za privremenog korištenja javne površine.

Ukoliko korisnik javne površine ne dostavi dokaz iz prethodnog stava, inspektor pokreće postupak uklanjanja objekta, opreme ili sadržaja sa javne površine i dovođenje javne površine u stanje prije početka korištenja, u roku od tri do sedam dana od dana izvršenja nadzora.

Član 68.

Ako korisnik javne površine ne postupi po rješenju inspektora iz prethodnog člana, organ nadzora određuje da se potrebne radnje izvrše putem trećeg lica na teret korisnika koji je prouzrokovao troškove.

Takođe, protiv vlasnika bespravno postavljenih objekata, opreme ili sadržaja na javnoj površini koji nema odgovarajuće odobrenje ili ne dostavi dokaz o podnesenom zahtjevu u roku nadležnoj službi, inspektor istim rješenjem propisuje odgovarajuću novčanu kaznu.

Član 69.

(Pravo žalbe i nadležnost)

Protiv upravnih akata koje je donijela Služba za urbanizam a odnose se na objekte i sadržaje iz člana 15. stav 1, tačke 1; 2; 3; 4. i 5. može se podnijeti žalba u roku od 7 dana od dana prijema rješenja, koju kao drugostepeni organ rješava Ministarstvo prostornog uređenja, građenja, zaštite okoliša i stambenih poslova SBK/KSB (u daljem tekstu: Ministarstvo).

Protiv ostalih upravnih akata koje je donijela Služba za urbanizam ili Služba za komunalne poslove, može se podnijeti žalba u roku od 7 dana od dana prijema rješenja, koju kao drugostepeni organ rješava Drugostepena komisija Općine Travnik (u daljem tekstu: Drugostepena komisija).

Protiv upravnog akta općinskog inspektora može se podnijeti žalba, u roku od 8 dana od dana prijema, koju u drugom stepenu rješava Općinski načelnik.

Žalba protiv rješenja inspektora ne odlaže izvršenje rješenja.

VI. POSTOJEĆI PRIVREMENI OBJEKTI I SADRŽAJI

Član 70.

Danom stupanja na snagu ove Odluke, postojeći privremeni objekti, oprema ili sadržaji na javnoj površini za koje je izdato odgovarajuće odobrenje za privremeno korištenje javne površine, zadržavaju se do roka datog u rješenju te po isteku istog, važe odredbe ove Odluke za predmetni objekat, opremu ili sadržaj na javnoj površini.

Korisnicima javne površine, odnosno vlasnicima postojećih privremenih montažnih objekata, koji ne ispunjavaju uslove za dobivanje novog rješenja o korištenju javne površine po ovoj Odluci, nadležna Služba donosi odbijajuće rješenje nakon čije pravosnažnosti, predmetni objekti, oprema ili sadržaji se od strane nadležnog inspektora tretiraju kao bespravno postavljeni te se tako prema njima i postupa.

VII. KAZNENE ODREDBE

Član 71.

Novčane kazne propisane su od članovima 24; 25; 26. i 27. Zakona o privremenom korištenju javnih površina na području SBK/KSB.

VIII. PRIJELAZNE I ZAVRŠNE ODREDBE

Član 72.

Rješenja o privremenom korištenju javne površine izdana do stupanja na snagu ove Odluke, ostaju na snazi do isteka roka utvrđenog u rješenju.

Ako je do stupanja na snagu ove Odluke podnesen zahtjev za privremeno korištenje javne površine a po istom nije doneseno prvostepeno rješenje, postupak će se nastaviti po odredbama ove Odluke.

Član 73.

Stupanjem na snagu Zakona o privremenom korištenju javnih površina na području SBK/KSB („Sl. novine SBK/KSB“, broj 14/16) dana 01.01.2017.g. dosadašnje odluke se stavljaju van snage, a to su:

1. Odluka o zauzimanju javnih površina za formiranje ljetnih bašti, postavljanje tezgi, frižidera za prodaju industrijski pakovanog sladoleda, „autodroma“ za dječije autiče i drugih elemenata gradske opreme („Sl. novine Općine Travnik“ br.21/03 i 5/08),
2. Odluka o postavci privremenih poslovnih objekata („Sl. novine Općine Travnik“ br.16/06 i 4/09

Odluka o komunalnom redu („Sl. novine Općine Travnik“ br.13/18) će se uskladiti sa Zakonom o privremenom korištenju javnih površina na području SBK/KSB i ovom Odlukom.

Član 74.

Ova Odluka stupa na snagu osmog dana od dana objavljivanja u „Službenim novinama Općine Travnik“.

Broj: _____ /22
Travnik, _____ 2022.godine

Predsjedavajuća Općinskog vijeća
Vlatka Lukić, dipl.teol.

Obrazloženje

PRAVNI OSNOV:

Član 8. stav 3. alineja 4. i 8. Zakona o načelima lokalne samouprave u Federaciji Bosne i Hercegovine ("Službene novine Federacije BiH", broj 49/06), član 2. i 42. Zakona o građenju („Službene novine KSB/SBK“, broj: 10/14), član _____ Statuta Općine Travnik ("Službene novine Općine Travnik", broj:11/05), član____. Poslovnika o radu Općinskog vijeća Travnik („Sl. novine Općine Travnik“ broj:___), te član 29. Zakona o privremenom korištenju javnih površina na području SBK/KSB („Sl. novine SBK/KSB“, broj: 14/16).

RAZLOZI ZA DONOŠENJE:

Sadašnje važeće: Odluka o zauzimanju javnih površina za formiranje ljetnih bašti, postavljanje tezgi, frižidera za prodaju industrijski pakovanog sladoleda, „autodroma“ za dječije autiče i drugih elemenata gradske opreme („Sl. novine Općine Travnik“ br.21/03 i 5/08) i Odluka o postavci privremenih poslovnih objekata ("Sl. novine Općine Travnik" br.16/06 i 4/09) se stavljaju van snage zbog donošenja Zakona o privremenom korištenju javnih površina na području SBK/KSB („Službene novine SBK/KSB“, broj 14/16) koji je stupio na snagu dana 01.01.2017.g.

Zakonom o privremenom korištenju javnih površina na području SBK/KSB je propisano da su sve općine dužne u roku 90 dana uskladiti svoje propise iz ove oblasti. U skladu s tim, Općina Travnik je krenula u realizaciju zakonskih odredbi, tačnije formirana je stručna Komisija za izradu Plana korištenja javnih površina na području općine Travnik, predložena od strane Općinskog načelnika Travnik a imenovana od strane Općinskog vijeća koja je izradila prijedlog ove Odluke o korištenju javnih površina na području općine Travnik kao i Planova korištenja javnih površina na području općine Travnik, te ih putem Općinskog načelnika dala Općinskom vijeću na razmatranje i usvajanje.

Uvidom u prijedlog Odluke o korištenju javnih površina na području općine Travnik vidljivo je da je uvedeno par novih instituta kao što su privremena rješenja o: odobrenju za postavljanje, dozvoli za korištenje i komunalnom odobrenju a što je u skladu sa pomenutim Zakonom o privremenom korištenju javnih površina na području SBK/KSB.

Komisija je stala da su formirane cijene u ovoj Odluci dosta funkcionalne i realne, uz određene izmjene u odnosu na pomenute Odluke koje se stavljaju van snage. Za određen broj načina zauzimanja javnih površina do sada nije bilo uopće propisanih naknada za zauzimanje javne površine a ima i određen broj novih načina zauzimanja javnih površina koji su definisani u ovoj Odluci a u skladu sa Zakonom o privremenom korištenju javnih površina na području SBK/KSB za koje je takođe ovom Odlukom predviđena naknada.

Za nove načine zauzimanja javnih površina koji nisu do sada bili definisani Odlukama ili su korigovani, vodilo se analizama većeg broja općinskih propisa u FBiH koji regulišu ovu oblast, prvenstveno zbog novih načina zauzimanja javnih površina.

Zbog određenih nelogičnosti zbog pripadanja ugostiteljskog objekta nekoj zoni, Komisija je izanalizirala kompletno područje općine Travnik, uzimajući u obzir ne samo ugostiteljske objekte zbog bašči nego i kioske te ostale sadržaje za koje se izdaju rješenja od strane Službe za urbanizam i Službe za komunalne poslove te u konačnici ovom Odlukom predložila da se područje Općine Travnik podijeli u tri zone javnih površina što je grafičkim prikazu i naznačeno.